

## Ebereecuru rai letoi

*Rai Calaohi aina cuaainte cachaauru rai erelu  
Cana Coaunera.*

<sup>1</sup> Inoaelu jetaote nere bera inoaesihuru- *profetacuru* aina cuaain araaisaain cana inoensihuru rai ere Cana Coaunera, ecoetacaeneein mituhelanaala, taba que acaauru sinihu, taba que letonocuru anjeraauru letoae, acaauru rai ecocohin beeuruhane coina, naaonjoaain.

<sup>2</sup> Nete laen inae enene Calaohi que nere berate Cana Coaunera, Cana Coaunera nihane coitucuhacache itolereneeinne coina. Nii rai Calaohi aina cuaainte, itolere cana rai chauratane, dede, itolere cautenu rijihuru, itolere cana janonaa, naaonjoainuri coaunaain niichuru Curuaanaa neein telu Cana Coaunera.

<sup>3</sup> Nihei chunei cacha niqui Cana Coaunera coaraai. Nete caje uhin canaacaanu rene ecooca rai Calaohine jaun, canaacaanu rohan turuaain coaracaanune jaun, “Naaonjoaan Cana Coaunera,” naain coitucuhacaanu, jeelai Cana Coaunera tocohaneein necaohachaaain nichao que ichaohana jaun. Acate Cana Coaunera Calaohineein itolere sirichaneein coaraneein ne. Acate Cana Coaunera Calaohineein caa chauratane que ohelu, jianacoon osa caje cana mitaeranu que. Nitohaneeinte inae osa caje cana mitaeranu que ohane baiha, rai Inaca Cana Coaunera raotono nichajai que rori- *trono* ichoae nelauriaa cuelu.

*Anjeraauru amurijiriinte cocoainanojineein ne Cana Coaunera Calaohi.*

<sup>4</sup> Jataain rai letonocuru anjeraauru cocoainaane amurijiriinte, rai Calaohi cocoainaelu Cana Coaunera, acaauru amurijiriin nihane coina.

<sup>5</sup> Nitohanihane jaun, nihei chuni letono anjera rai:

“Iite cacalabineein  
canuhacha jereineein  
canuhacha teineein  
nenaaneeicha,”

naain irihei Cana Coaunera. Niheichu chuni letono anjera que:

“Leinjiin acaacha  
canu calaohineein nihane janana,  
Canu, leinjiin  
inaca neein nereeunicha,”  
naain irihei Cana Coaunera.

<sup>6</sup> Caa chauratane que nenacaauru cachaaauru que, leinjiin acaacha rai calaohineein nihane coitucueratihane coinata laen:

“Quere tonoraain  
canu coroaeequichene rijijieein,  
jerichanejeein nere tonoraain  
coroaeeuche satiin,”  
nae, rai letonocuru anjeraauru rai, Cana Coaunera.

<sup>7</sup> Nii rai letonocuru anjeraauru quete laen:

“Canu letonocuru- anjeraaurute laen aiha cujanane rijijieein, usi rijijieein naaonjoain canuhacha jerei icharaneein neeurureein,” nae Cana Coaunera.

<sup>8</sup> Jana rai Calaohi quete laen:  
“Chabana sarinaain

itolere Curuaanaa neein-  
itolere Coaunera neein neeine.

Chaen techu

chabana satonoenereein  
caohacha ichaain neeine.

<sup>9</sup> Nii rijijieein techu

caohacha nejesina ichara  
curuaanaa neein neina jaun,  
esinae rauhijiriin

baaso ichaain nenacaauru aina nejerateein,  
caohacha icharaauru belairiquiin.

Nii coinane

Canu, Itolere Coaunera neein

ii Coauneranichaaunne

ii teein neeun,

ii, jataain

leechoaauru amuritoheriin

raotojoein rachoojoein

neeine coina,”

nae Cana Coaunera.

<sup>10</sup> Chaen techu:

“Ii canuhacha tei  
Curuaanaa neeinete,  
jauriaanejeein

nunuhe caje coauneein niha

cana rai chauratanene coina

aitiin dede coaunaailu.

<sup>11</sup> Satiin iicha coaunanojoite sareein.

Jana iite laen chabana nitajenereeni.

<sup>12</sup> Inae ecu tihane banate,

siriteein saa cajionene jaohin,

enachasine que coreein jianaa rijijieein,

janonaa coreriquiin.

Nete laen,

ii chabana satonoelanaala

ichaoriquiin,”

naelu rai Calaohi rai Cana Coaunera.

<sup>13</sup> Nii jaun coatiha chuni, rai letono anjera rai:

“Chajaute

caraaotono nichajai que nelaauriaena,

ii tijia asaae

iniha nejeratenacaauru

amuritiin tee te coaraaicha,”

naailu Cana Coaunera. Chabana nii Calaohi que aitothane rijijieein letono anjeraauru que iriheĩ.

<sup>14</sup> Nechu raujiaain ichoteratenojieein nerichaacheeinne rai, cha beraneeichate suujueenein Cana Coaunera tenojieein neeure rai anjeraauru.

## 2

*Cana ichoterateraneein nena que jaoleconaa nainihaacache.*

<sup>1</sup> Nitohanihana jaun, nere beracuru que Cana Coauneraacha beratei aonaain tonoraain-esenetaain nihacachenete caohachae. Jana nii cana rai niicha beratenojoin aonaain caohatiin coitucunaa saijieein tonoraenihacachenete, aihuruha coitucuelanaala nenacaaurune rijijieein nitajerichaacheein.

<sup>2</sup> Coaracuche nachuhinti, nii rai letonocuru- anjeraauru que niicha teratei niha nii rai jauriaanejeein nena- rauhine saijieein tonoraelanaala naosatenacaauru cachaauru- esinae rauhijiriin baaso ichacuruhane coreniha caseteco coaracurhalune.

<sup>3</sup> Nitohanihane jaun, caseteco caje nichotena nainerihacacheein, nii jauriaanejeein nena amuritoheriin, cana ichoteraneein nena esenetaenihacachene. Esenetaain nihacachene

coinate, jauriaanejeein raaje nihane cana rai been nelu Cana Curuaanaa Jesocurisito. Nii baihate cana rai beeurelu aina amuhemujueein nota que coaraauru.

<sup>4</sup> Nii ichoae tacaain techu, cana que coitucuerate Cana Coaunera itolere cojoelanaacojoaihuru ichaain. Chaaen techu Aca jerihane rijjijeein, le cacha nichaachene rai niicha tei- Suujue aina cuaain cana que coitucuerate.

*Cana nejera rijjijeein niha Jesocurisitone*

<sup>5</sup> Coatiha rai letonocuru anjeraauru, nii cabaiha neenihu rai Cojoanonaa caa ereereecaachene jaan coaraneein neeuruhane coina aitohi Cana Coaunera.

<sup>6</sup> Nitohanenihane quete:

“Chaneein ne cacha.  
Chatohanaineeina nenaane cacha.  
Chanuna acaacha coacuhin,  
jataaen queecha coauqui.

<sup>7</sup> Jauriaanejeeinte niqui  
ii letonocuru- anjeraauru  
cocoainaine fautaain cocoainailu.

Nete nii baiha laen,  
jataain leeochoauru amurijiriin cocoainain,  
que itolere Curuaanaa nihane comai lauriaain,

<sup>8</sup> satiin nere tonoraain  
neeuruhane coina ichaain,  
tjia asaae que nejeratenacaauru  
teilu,”

naain ne laenanohineein Cana Coaunera Quiricha cuhane. Nitohaneein satiin nere tonoraain nihacachane coina, cocoainain rai tjia asaae que nejeratenacaauru tihane coina,

aitohane saijieein jaiti nitohaneein ichaa Cana Coaunerane coarahaacache.

<sup>9</sup> Nete laen, inae anjeraauru fautaain nelatihei rijijieein turuhin nihalu carajaaajoaain Jesocurisitone coaracaache. Nitohaneein turuhinte, rai chaneein nenihacachene saijieein, jataain cana belaitohane jaun, cana coreniha ohane coina ichaelu Cana Coaunera. Nii cana coreniha cairichanojineein ohalune corenihate, itolere curuaanaacuru Curuaanaa neein nihane cojunacaneein necaohachaa Cana Coaunerane que comaitenojineein ne.

<sup>10</sup> Satiin itolerete Cana Coaunera rainnein ne, niicha coaunanojineein niha itolerene jaun. Nii jaunte niicha coaunanojineein rai calaohi neein nihacachene jaun, rai Cojoanonaa caa baiha neeni que nihacachene jere Cana Coaunera. Nii jaunte cana coreniha necairichaa Jesocurisitone aina cuaain, nii aansijiiniji osa colane telu, satiin niicha coaunanojoinunru ichoteraneein nihane coina.

<sup>11</sup> Nitohanihane jaunte, ita Inaca que Inacaain nihacache, nii cana osa caje cana ichoteratera aina jiniiquiin. Nii jaunte, rai nejera neein inae nihacachene jaun coejelanaala: “Canejeraauru,” nae cana rai Cana Coaunera Calaohi.

<sup>12</sup> Niritorichaaaine quete:

“Canejeraauru raine

Iineein neeine beebejeein,

netaojiaain

Ii coroaeraauru cataaun

nenatereeeunni,”

naalune, laenanano hineein nelu Cana Coaunera Quiricha cuhane.

<sup>13</sup> Chaen techu:  
 “Leinjiin Acaachane  
 niicha ichai ichaane coina  
 cohajereeunni,”  
 naain.

“Cauna neeun,  
 canu rai Cana Coaunera  
 tenojoihunru- cacalabihuru  
 ainara,”  
 naain ne laenanohineein.

<sup>14</sup> Charijieein teeinti, ita araainein niha cachane, ita iniho que inihoquiin, ita coichana que coichanaain, naaonjoaen cacha, nii rijijieeinte cacha iniho que inihoquiin cacha coichana que coichanaain naaonjoaelu Jesocurisito, caa chauratane que ohin, nii cacha itajeraneein nenea moconajaera amuritothane coina.

<sup>15</sup> Nitohaneein moconajaera amuritiinte, ohin nitajeeururichaaine que satiin casiiriin ichaonacaauru- cachaauru ichoteratelu.

<sup>16</sup> Aihane jaun, coatiha anjeraauru coroatajanihane coina turuhin niheilü, Abaraaun nefoerateneein nenacaauru coroatajanihane coinatë turuhin nelu.

<sup>17</sup> Nitohanihane coinatë, jericanejeein cana nejeraneein, nihacachene rijijieein tenojoineein nelu, Cana Coaunera notaracae coujurihu cana rai saseredotecuru curuaanaacuru Curuaanaaneein, cairichaaajoaain cana coaraain, cana coreniha cairichei coaraain ohane, satiin cachaauru osa que suujua acatena nainiha Cana Coaunerane coina.

<sup>18</sup> Nitohaneein raajenihane necairichanaa coaraain, cojunojineein nihalune jaunte,

rijijieein necairichanaa coaraain, cojunojoinnein niha cachane coaraane, coroatajanein naaonjoaen.

### 3

#### *Moisesa amurijiriin cocoainanohi niha Jesosone*

<sup>1</sup> Canejeraauru, aihane jaun Cana Coaunera ranojoinnein, inae rai cachaneein neeichene jaun, niicha icharatenohi icharaanu que niicha tei- Jesocurisitohacha que coaucuche. Nariha jataain coreniha chabana satonoelanaala esenetaacachene jaun.

<sup>2</sup> Jerihane rijijieein nere tonoraain niha Jesocurisitone jaunte, niicha icharatei icharaanu que cocoainaan nelu Cana Coaunera. Nii rijijieein techu, Cana Coaunera cachaneein nenacaauru aina, niicha icharatenohi icharanein nelu Moisesa.

<sup>3</sup> Charijieein teeinti, niicha jai loreri amurijiriin jataain nelateinein ne loreri ichara, nii rijijieeinte, jataain Moisesa amurijiriin nelateinein nelu Jesocurisito.

<sup>4</sup> Itolere lorerite, niha icharane jaun neein naaonjoaen. Nete laen Cana Coaunera coaanaane jaun, neein naaonjoaen itolere.

<sup>5</sup> Nii rijijieein techu, rai cachaneein nenacaauru rai Cana Coauneraacha icharatei icharanein nihane jaun, raujiaain nota que coaraain, que niicha beratei beranein nelu Moisesa.

<sup>6</sup> Nete laen rai Calaohi Jesocurisito, cana rai cachaneein- rai loreri rijijieein nihacachene amurijiriin, cocoainaan cana inana neein telu.



Nii jaunte, rai loreri rijijieein nerichaacheein,  
 esinae rauhijiriin jerihane rijijieein neein,  
 chabana cohajihacachene coiinteein jianelanaala  
 canaacha cohajei cohajihacachene.

*Acaauru que Cana Coauneraacha banihatihu  
 turuurenerichaaain rai cachaauru tabaaurune*

<sup>7</sup> Nitohanihane jaun, rai Quiricha Inoaensi  
 cuhane:

“Enene cojoanonaa  
 cuhane inara rai niicha jerei  
 biha Cana Coaunerane,

<sup>8</sup> jiaonriha

inara suujua aohana jerelanaala,  
 aihuruhalu nere tonoraelanaala,  
 nech u acaauru casetecaa  
 Cana Coaunerane cojuhin coaraa  
 cacha areroo ichatane janane  
 rijijieein nihache.

<sup>9</sup> Ecute

jenachoonca jaanacaneein  
 mainajeriin acaauru notajaain,  
 acaauru coroatajanichaaunne saijieein,  
 acaauru casetacaanune coujuha  
 quere tonoraarenelu- inara foerateracuru.

<sup>10</sup> Nii jaunna,

nii inara foerateracuru aina obajeein:

‘Nechu itolere bana  
 joenreein rai suujua cuaauruhane jaunte,  
 acaauru que  
 canuhacha coitucueratenaa  
 jerei coitucunaa jerecurene.’

naain:

<sup>11</sup> Aihane jaun,  
 coatiha acaauru que banihateein

canuhacha rucujueihu

turuururinaain,”

naain biha Cana Coaunera Suujuene jaun ne lae-  
nanohineein.

<sup>12</sup> Aihane jaun canejeraauru, le cacha  
nequichene- inara netonai nabana cana rai  
Cana Coaunera beratei esenetaain neeichene  
jianequichene coataa, que nainain necohalajiin  
ichaaоче.

<sup>13</sup> Nitohaneein nenea coacuelanaala, jianein  
lecacha nequichene jiniiquiin ita suujua lararaji-  
aain neeuche: “Enene cojoanonaa,” naain aitoa  
Cana Coaunera Quiricha cuhanena jaan que tu-  
rusihane ajiniha. Nabana inara tabaauru saruhin  
niha osane, rijitjoein chatohanai ichaquichene,  
inara netonai canaacha esenetai esenetaelanaala  
naitoonjoan tonoraeneeichene coataa.

<sup>14</sup> Nitohanihane jaun, esinae rauhijiriin Je-  
socurisito aina nenea jerichaachene, nii esene-  
taacachene bana canaacha cohajei que turuhane  
reeintiaain esenetaacachenete ne.

<sup>15</sup> Nii coinate:

“Enene cojoanonaa cuhane

inara rai niicha jerei biha

Cana Coaunerane,

jiaonriha

inara suujua aohana jerelanaala,

aihuruhalu

nere tonoraelanaala

nenacaaurulune rijijieein nihache.”

nae Nere Inoaesi.

16 “Charijihuru Cana Coaunera ere aonacuruhane saijieein nii baiha nere tonorana jerecurenelu,” naaichena. Acaaurute, satiin Egipto batane caje Moisesaacha rocoorinelu.

17 Nii jeelaihuru que techu, nitohaneein nere tonoracurenihane jaun, acaauru que nejerateein acaauru coroatajanihane jianiha jenachoonca jaanacaneein Cana Coaunerane jaun, ichataneu cache areroo satiin ohacoaaurelu.

18 Chaen techu nii jelaihuru, rai nitohaneein nere tonoracurenihane jaun, esinae rauhijiriin acaauru que banihateein niicha rucujuihu enoorenerichaaine que aitelu Cana Coaunera.

19 Nii jaunte, esenetacurenihane coreniha nii acaauru que banihateein niicha rucujuihu tururenerichaaine coitucuhacache raotojoein.

## 4

1 Aihane jaun, jaiti cana rai niicha teeni, rai nebetacanaa cojoanonaa tihane rai niha Cana Coaunerane jaun, ecu turunaa nainichaachene coina, jataain necohalajiin ichaohacachenete caohachae. Nabana inara tabaauru, ecu turunaa nainecurenihane coataa.

2 Nitohaneein cana netonai ecu turunaa nainichaachene cointate, nii Moisesa que beratihalu acaauru raine rijjijieein, cana rai netonai beratelu.

Nete laen inacojoein acaauru rai beratelu, aonacuruhane saijieein, aihuruha nii niicha beratei esenetaain tonoraeraaurune rijjijieein, acaauru netonai esenetaaurenihane jaun.

3 Nete laen cana, esenetaera neein nihacachene jaun, nii Cana Coaunera aitoonjoan- nebetacana

jaaun enorichaacheein. Nitohaneein nere tonoraaururichaaaine jaun, aitorichaaaine quete:

“Nii jaunna obajeein,  
esinae rauhijiriin

nebetacaanune jaaun

turuurenerichaaaine que aitoon”

naain belu Cana Coanera. Nete cana rai chauratane coaunaane nainaalune caje coauneein nelu, nii nebetacanajaa cojoanonaa naitoonjoa.

<sup>4</sup> Nii jaunte rai Quiricha Inoaensi cuhane:

“Caainsi janone cuhane jetaote,

itolere coaunaane nainain- bana

nebetacaelu Cana Coanera,”

naain laenanohineein ne.

<sup>5</sup> Nii baihate coaiten rai Quiricha cuhane, nii Israelitacuru que:

“Coatiha canu nebetacana jaaun turuurinaain,”

naalu Cana Coaunerane, ne laenanohineein.

<sup>6</sup> Nete, nere tonoraain ichoteratenojoineein neeururichaaaine aonacuruha ichoaichaniha natiin, esenetacurenihane jaun, nii nebetacana jaan Cana Coanera aitoonjoaun turuureniha Israelitacurune coina aitohalune saijieein, jaiti neure satononiha nii naitoonjoan esenetaeraauru, acaauru coreenraniha nii nebetacana jaaun turuheninuunru.

<sup>7</sup> Nii jaunte, nii nacoauneein le janonaa que cojoinacate Cana Coanera:

“Enene cojoanonaa,”

naain. Nii Quiricha Inoaensi caje coitucuhichene rijijieeinte, que beratiha Cana Coaunerane jaun:

“Enene cojoanonaa cuhane

niicha jerei beratiha

Cana Coaunerane,  
jiaonriha tonoraeneeeichene,”  
naain belu Rabiri.

<sup>8</sup> Nii aina cunacaaurulu- Isaraelitacuru turuaalu Josoene jaan jelai que, aitohalu Cana Coaunerane jana nihane, coatiha leeocho janonaa berihei Cana Coaunera, rai nebetacana jaan nihacachene que aitiin.

<sup>9</sup> Nitohanihane jaunte, satiin Cana Coaunera cachaneein nenacaauru rai, ne jelai teein acaauru que banijiaain nebetacaauruna jaanu.

<sup>10</sup> Charijieein teeinti itolere coaunaane nainaan nebetacaelu Cana Coaunera, nii rijijieein techu, rai namihaneeo caje nebetacaa aicheein, nii Cana Coaunera nebetacanajau turuhin nei.

<sup>11</sup> Aihane jaun, nii nere tonoraelanaala nenacaauru rijijieein nena coataa, atiin caaintati ichacaachene coina cana letoaane nihanatiin nere tonoraacachenete ne, nii rai nebetacanajau turunaa nainichaachene coina.

<sup>12</sup> Nii cana rai Cana Coaunera beratenojoi Er-enaate, cana ichao coreein, cana rai leeocho ichaonaa teraneein, naajoainein nena ne. Acate aiha soondarooru rai sabere- jerane ajinaain nenaane amurijiriin nihane jaun, cana suujua cuhane enohin cana suujuene maajeein coitucue. Nii jaunte cana suujua cuhane canaacha coacui, canaacha ichana jerei, naaonjoainuri baasoneein, caohachaneein, naaonjoaane coitucue raotojoein.

<sup>13</sup> Nitohanihane jaun, nihei chuni Cana Coaunera coaunanojoeinein nena, que nasiha

nainera. Acate inae ecu tihane bana rai canaacha beenei coitucue.

### *Saseredotecuru curuaanaa Curuaanaa Jesoso*

<sup>14</sup> Cana Coaunera Calaohi Jesusote, acaihaniji cana rai saseredotecuru curuaanaacuru Curuaanaa neein dedeeu cuelu. Aihane jaun, leinjiin acaacha esenetaain cohajihacachene rijijieein, itolere bana jianena coacuelanaala beebejeein, acaacha cohajihacachenete caohachae.

<sup>15</sup> Acate cana rai saseredotecuru curuaanaacuru Curuaanaa nihane jaun, coujunojoinichaachene enaacha osa que nesaruna nainichaachene coitucue; acaentonai aihacachene rijijieein coujunojoneein nerejetoהלune jaun. Nete laen, nii saijieein chabana osa que nesaruenelu.

<sup>16</sup> Aihane jaun, chaque tonajelanaala, atiin cana belaicha Cana Coaunera rori- *trono* rohan netichaachenete ne; cairichaaajoaain cana coaraain, latichaachene naineein cana rai caohacha ichaain cana coroatajanena nainihane coina.

## 5

<sup>1</sup> Satiin saseredotecuru curuaanaacuru curuaanaate, cachaauru jana janijiin, Cana Coauneraacha teineein ne, aca cachaauru osa coreniha, Cana Coaunera rai itolere teein, inihocuru mocoeranu *sacrificios* que nihane coina.

<sup>2</sup> Nii jaunte acaentonai joenreein cacha rijijieein nihane jaun, cairichaaajoaain-cha coitucuelanaala nenacaauru, nitajerai nenacaauru, naaonjoainuri coarae.

<sup>3</sup> Nitohaneein joaaenreein cacha rijijieein nihane jaunte, rai nosa, cachaauru osa, naaonjoain coreniha, Cana Coaunera rai itolere lenonecuru *sacrificios* sohin mocoe.

<sup>4</sup> Nihei chuni raajenhane jerihane rijijieein, saseredote neein cocoainanohineein nei. Aaroon janijiin raain cocoainaalune rijijieein, raain cocoainaa Cana Coaunerane banaachate laen saseredote neein nenea naine cacha.

<sup>5</sup> Nii rijijieeinchu coatiha raajenhane saseredote neein nihane coina, cocoainanohineein niheilu Jesoso, Cana Coaunerate cocoainain nelu. Acate rai:

“Iite canu calaohineein,  
enene canuhacha teineein  
neei,”  
naelu.

<sup>6</sup> Chaen techu, rai Quiricha Inoaensi cuhane:

“Iite chabana satonoelanaala  
saseredote neein neriquiin,  
aihalu Melquisedee ne rijijieeincha,”  
naain ne laenanohineein.

<sup>7</sup> Jaiti cana rai chauratane que ichaohane bana, atinaaururichaaaine caje ichoteratiha Cana Coaunerane coina, jataain chanaain, caje bajaa Jesocurisitone janate, jataain nere tonoraeranihane jaun, corootajanelu nii cairichaururichaaaine abaantana nainihane coina rai Inaca Cana Coaunera.

<sup>8</sup> Nitohaneeinte Cana Coaunera Calaoihiniane saijieein, necairichanaa coaraain nelu Jesocurisito, jeriha rai Inaca Cana Coaunerane rijijieein nenea jerenacaun.

<sup>9</sup> Nitohaneein jataain Inaca ere tonoraeraneein nihane jaunte, Aca, satiin nere tonoraain neinichaachene ichoterateraneein ne.

<sup>10</sup> Nii jaunte Melquisedee rijijieein nenea saseredote neein cocoinaelu Cana Coaunera.

*Jataainte elunae esenetaain nihancane jianichaane.*

<sup>11</sup> Niha jataain arajiin inara rai irihanune jaanu niqiu. Nete jataain caaintate inara rai bihanune, cha aonaquichene nihanatiin coitucusineechene jaun.

<sup>12</sup> Inae niqiu carajaa, inara cacha relaeraneein neeichene jaanu rijijieein Jesocurisito coitucuhin neeichene. Nete enanetjoeein caaintajelanaala cana relaa Cana Coaunerane jaan que nihanatiin nacoauneein inara relaera jerequiche. Nii jaunte aiha leinjiin canaanai ujuarine rijijieein neeichene jaun, iniho quinaa nainenihane jaun, itariicha cohajiha canaanai ujuarine rijijieein jataain caaintaelanaala nenea que inara relaera jerequiche.

<sup>13</sup> Nii itari coha canaanai ujuarine rijijieein, caaintajelanaala relaera jereraaurute, leinjiin canaanai rijijieein neein niicha ichai coitucuelanaala ichoae.

<sup>14</sup> Nete laen nii iniho que cuaain inara re-laanune jaan Cana Coaunera Ere neein nenea ne. Acate, inae acaauruhacha coacui coitucuhin, “Naaonjoainte baaso ne,” jana, “Naaonjoainte caohacha ne,” naain coitucuhin nenacaauru rai benojoi ne.



## 6

<sup>1</sup> Aihane jaun, inae caohatiin jauriaanejeein Jesocurisito que nerelacaachelune jaun, inae leechaneein coacuelanaala, ainaacha iicha cana suujuane reentiaain sacuhacachenete ne.

Inae nainihej nacoauneein jauriaanejeein esenetaacachene nunuhetihacachelune rijijieein neein, baaso ichaquichene coreniha cana nitaje rai nihacachelune rijijieein nena nainihaacache.

<sup>2-3</sup> Raujiaain Cana Coaunera esenetaain, cachaauru baotisaain, biji que Jesocurisito esenetaeraauru dadaain acaauru rai Cana Coaunera bajaain, o caje ichanaain neeururichaaon onacaaurune, nerichaaon chabana satonoelanaala casetecone, naaonjoainuri coitucuhacache caohatiine jaun, jianeain nena coacuelanaala que leechaauru relaacachenete ne. Jeriha Cana Coauneranete nitohaneain icharichaacheein.

<sup>4</sup> Nitohanihane jaun, inae le sajeein itolere coaraain coitucuhin, Cana Coaunera Suujue siriin,

<sup>5</sup> jataain caohatoha cana rai Cana Coaunera beratenojone coitucuhin, itolere que jataain nelateineain nerichaaon caa baiha neeni janonaa quene coitucuhin,

<sup>6</sup> naaonjoaain neeichene saijieein jianequichene, inae nacoauneein jeriha Cana Coaunerane rijijieein ichaonaa naineriheicheein, coroso que Jesocurisito teein, nocoeje chanuuruhallune tochaneein rai nocoeje chanuha airiquicheeine jaun.

<sup>7</sup> Nete laen atane caohacha que temule jaera rai, atane setejiaa elone caohatiin omarohin in-

acaain nihane rijijieein, jeriha Cana Coaunerane rijijieein neeichene, inara rai caohacha ichaain inara coroatajanereein Cana Coaunera.

<sup>8</sup>Jana nii temule jaera rai ojoa aina omane neeo-joaain niha nii temulene rijijieein neeichenete, laen inara cojiotaain inara mocoeratereein Cana Coaunera.

*Canaacha cohajeite leinjiin acaacha cohajihacachene icharaneein ne.*

<sup>9</sup>Nete, inara rai caritiin aitocooaunne rijijieein, inara inae jeriha Cana Coaunerane rijijieein ichaohin iiquichene coina, nichoterichaacheeine esenetaaichene caje cuaain leeochangeein coacuelanaala neeichera canejeraauru.

<sup>10</sup>Nii jaunte, chabana baaso ichaenihane jaun, nii enanetojoein ichaquichene rijijieein, leeochoauru cana nejeraauru- canaacha esenetai esenetaeraauru belaiquichene coarateein, coroatajanequichelune baitenereein Cana Coaunera.

<sup>11</sup>Nete laen, jataain ainaacha iiquichene reeintiaain, acaacha cohajein, esinae rauhijiriin corajeein ichaquichene coarateein, inaraacha ichai ichaquichene caohachae.

<sup>12</sup>Coatiha chaque nelatihei chachaain neeichene coiinteein ichaquichene. Charijieein teeinti itolere bana jianelanaala esenetaain neeuruhane jaun acaauru rai tihane coina Cana Coaunera aitoonjoa raeranein neure esenetaeraauru, nii rijijieein neeuche inara netonai.

<sup>13</sup>Abaraaun rai niicha teeni tihane coina aitohalune banate, leinjiin Acaacha itolere amurijiriin nihane jaun, inae neniha amurijiriin

neine jaun, aca Cana Coaunera neein coarajeein icharichaaaine coina:

<sup>14</sup> “Canune ii coroatajaneein, arajiin janiinacajelanaala nefaauruha iicha foerateeurine coina ichareeunicha,” naain Abaraaun rai biha Cana Coaunerane jaun,

<sup>15</sup> luhecaelanaala carajaain cojoaain, nii rai tihane coina Cana Coaunera aitoonjoa raelu Abaraaun.

<sup>16</sup> Nete laen cachaauru cha chana jerecuruhane, “Cana Coaunera coarajihane jana icharihanine que,” aitiin ichae. Nii jaunte, cha chana jereein nihane esinae rauhijiriin icharihanine esenetaera coina, “Cana Coaunera notaracaae icharihanine coina,” aitothane, inae nene nenacaaen rohecaera.

<sup>17</sup> Nii rijjijeein techu, nii niicha teeni raeraneein neenihuri rai, aansijiinniji nii aitothane corelanaala, esinae rauhijiriin icharichaaaine coitucuruhane coina, aca Cana Coauneraneein coarajeein icharihanine que aitelu Cana Coaunera.

<sup>18</sup> Cana coritaelanaala niicha teeni naitoonjoan, aca- Cana Coauneraneein coarajeein icharihanine coina, Cana Coaunera aitoonjoante raacache, Aca itolere baaso caje cana beraichaneein nihane coina, naitoonjoaacha cohajeein niha-cache jaun.

<sup>19</sup> Nii cana rai niicha teeni- canaacha cohajete, nitajihane coataa cana suujue nunaeraneein ne. Charijjijeein teeinti, cujuana nichajai que auriteein bote nunae rai nunaera- ancla, nalaa fichafichaanaane coataa nii rijjijeein. Nii canaacha cohajete chabana turunaa nainenihacache Teenforo cuhanai bujuaneein nena ne

jaaun- cana turuhaeranu que nenaaneein ne.

<sup>20</sup> Nitohaneein ecu cana turuaeranu quete cana rai chabana satonoelanaala nenea saseredoteneein nelu Jesoso, aihalu Melquisedee ne rijijieein.

## 7

*Saseredote inoaensi- Melquisedee rijijieinte nelu Jesoso.*

<sup>1</sup> Nii Melquisedee jetaote- Cana Coaunera rai saseredote neein, Saleen batane curuaanaa neein nelu. Nii Melquisedee jetao techu, leeochoaauru curuaanaacuru *reychuru* cachaauru amuritiin sohin jitariin acaauruhacha sirii ruluha acaauru cajene baiha caaujiha Abaraaunne jana, que tacaain cuhin, coroatajaniha Cana Coaunerane aina leeochoaauru amuritothane que aitiin cojio-taain corojelu.

<sup>2</sup> Nitohaneein coroaecane jaun jetaote, nii leeochoaauru amuritiin sohin acaauru caje niicha ruluhi lechooncanu telu rai Abaraaun. “Melquisedee” naane jetaote: “Caohacha ichara curuaanaa” naane aite. Jerichanejeein jetao techu: “Saleen” naane: “Raotojoein nenea” naa aite. Nii jaun jetaote, nii Saleen batane curuaanaa nihane jaun: “Raotojoein nihacachene tera curuaanaa” naaure Melquisedee que.

<sup>3</sup> Nihei coitucueraai rai inaca, rai neba, foer-ateracuru, naaonjoainuri. Niheichu coitucueraai nejanoa, ohin, naaonjoaane. Nii jaunte, acaihaniji chabana satonoelanaala nenea Cana Coaunera rai saseredoteneein ne, aihalu Cana Coaunera Calahine rijijieein.

<sup>4</sup> Coaracuche nachuhinti jataain nelateineein niha nii Melquisedee ne jaun, nii leeochoauru curuaanaacuru cachauru sohin, niicha rului lechooncanu tihalu rai, cana foeratera inoaensi Abaraaunne.

<sup>5</sup> Moisesa tenojoi rauhite niqui, Lebi nefoerateneein nenacaauruhacha- saseredote neein leinjiin acaauruhacha, satiin cachauruhacha sirii lechooncanu raauruhane coina aitelu, satiin cachauru, acauru araaineein- acauru rijijieein Abaraaun nefoerate neuruha acauru netonoaine saijieein.

<sup>6</sup> Nii Melquisedee coatiha laen niqui, Lebi inamoco nihei. Nete nii saijieein, nii Cana Coaunera aitoonjoa raeraneein niha Abaraaun natiin, caje nii niicha rului lechooncanu bajaain Abaraaun cojiotaain corojaje.

<sup>7</sup> Nii coitucuhacachene rijijieeinte, nii cojiotaain niicha corojajei cache amurijiriin nelateineein ne, nii cojiotaera.

<sup>8</sup> Satiin caa chauratane que cachauru caje acaauruhacha sirii lechooncan raaurerate ooruhane rai neein aihure. Nete laen nii Cana Coaunera Quiricha cuhane, Melquisedee que naitoonjoa enanetojoein jaiti ichaonaa que aitona rijitoein aite.

<sup>9</sup> Nii rai niicha rului tiha Abaraaunne cajete, nii Lebi inamoconeein nenacaauru- saseredotecuru, enene cachauru caje acaauruhacha sirii lechooncanu bajaain raeraneein neenihuru netonai, Melquisedee rai niicha sirii teeuruhane coitucuhacache.

<sup>10</sup> Nii que taca cuha Melquisedeene jana, rai jaberoco cuhane jaiti najanoaelanaala neuruha

niicha foerateenihurune jana, rai niicha rului tihalu Abaraanne jaunte, jaiti nejanoaelanaala netiin acaauru netonai acaauruhacha sirii lechooncanu teein neeurelu.

<sup>11</sup> Nii coitucuhichene rijijieeinte, Aaron foeratenojineein nena- Lebi inamocooru-saseredote neein nenacaauru aina cuaain, Isaraelitacuru rai rauhi teein nelu Cana Coaunera niqii. Nete nii rauhi tonoraeraauru, esinae rauhijiriin jeriha Cana Coaunerane rijijieein neeurenelu. Nii jaunte nacoauneein saseredote letoaelu Cana Coaunera. Nete laen, nii niicha letoai Aaron nefoerate caje nenaanelanaala nihalu Melquisedeene rijijieein nenaane.

<sup>12</sup> Nii jaunte, nitohaneein necoriha saseredotene jaun, Cana Coaunera rai rauhi netonai necore.

<sup>13</sup> Nii ena nena cana rai saseredote- cana Curuaanaate, leecha Isaraelitacuru lauri caje nena nihane que aitiin laenanohineein ne Cana Coaunera Quiricha cuhane.

<sup>14</sup> Nii jaunte, nii coitucuhacachene rijijieein, Jodaa lauri caje nenaanein nelu cana Curuaanaa. Jana Moisesa coatiha nii Jodaa lauri caje nerichaaain saseredotene coina coacuhin iriheilu, neeururichaaain saseredotecurune bihane bana.

<sup>15</sup> Nii jaunte, jataain caohati saseredote Melquisedee rijijieein niha, nii ena nena cana Curuaanaa- saseredotene coitucuhacache.

<sup>16</sup> Aihane jaun, coatiha aihuruha leechaaurune rijijieein, “Acate rai laurineein ne,” naain rauhi cuhane laenanohineein nihei. Acate chabana nitajenaachara ichaonaa caje unaanein ne.

<sup>17</sup> Nii jaunte, nii rai:

“Iite Melquisedee rijijieein  
 chabana satonoelanaala  
 saseredote neein neriquiincha,”  
 naa Cana Coaunerane, ne laenanohineein  
 Quiricha Inoaensi cuhane.

<sup>18-19</sup> Nitohaneeinte nii jauriaanejeein nenea  
 rauhi, Moisesa rai rauhi, naaonjoain aina chaque  
 nelatenihane jaun, jeriha Cana Coaunerane ri-  
 jijieein cachaauru ichao rucuhena nainenihane  
 jaun, itajeein nacoauneein jataain amurijiriin  
 nelateineein nenea te Cana Coaunera. Acate laen  
 Cana Coaunera rene cana turuaeraneein ne.

<sup>20</sup> Chaen techu, aca Cana Coaunera neein  
 coarajeein chabana satonoelanaala nihane  
 coina, cocoinarihanine esenetaacachene  
 coina raajenihane aitelu. Jana leechaauru  
 saseredotecuru, coatiha chabana satonoelanaala  
 neeuruhane coina, aca Cana Coaunera neein  
 coarajeein cocoinaane coina aitohi Cana  
 Coaunera.

<sup>21</sup> Nete laen cana Curuaanaa, chabana satonoelanaala  
 nihane coina, aca raajenihane coarajeein  
 cocoinaane que:

“Canune

Cana Coaunera neein  
 caraajenihane coarajeein  
 icharihanuhine coina aitoon.  
 Nii jaun  
 nii caitoonjoan corerihaaunni.

Iite chabana satonoelanaala  
 saseredote neein neriquiin,”  
 naain ne laenanohineein rai Quiricha Inoaensi  
 cuhane.

<sup>22</sup> Nitohaneeinte nii jauriaanejeein nenea amuritoheriin nenea, cana rai Cana Coauneraacha teeni terateraneein nenaane Jesoso.

<sup>23</sup> Leeochaauru jauriaanejeein saseredote neein nenacaaurute, cana rijijieein cachaneein neeuruhane jaun, arajiin neeurelu, ohin nii baiha ichanana nainecurenihane jaun.

<sup>24</sup> Nete laen Jesoso ohin nitajenaa nainenihane jaun, leinjiin acaacha chabana satonoelanaala cana rai saseredoteneein ne.

<sup>25</sup> Nii jaunte, aina cuaain Cana Coaunera coacuhin ichaonacaauru ichoteratereein chabana satonoelanaala nihane rijijieein, acaauru netonai chabana satonoelanaala Cana Coaunera aina neeuruhane coina. Nitohanihane jaunte, chabana ohenihane jaun, itolere bana satiin esenetaeraauru coreniha bajaee bajaareein Cana Coaunera caje.

<sup>26</sup> Nitohaneeinte esinae rauhijiriin canaacha latei saseredotecuru curuaanaacuru Curuaanaa neein letono neein ne Jesoso. Acate Saantoneein baaso colane- niheichu osaquelanaala- osaaonacaauru caje, jelai dedeeu tenojoineein ne.

<sup>27</sup> Coatiha leeochaauru saseredotecuru rijijieein, jauriaanejeein rai nosa coreniha, nii baiha cachaauru osa coreniha, naaonjoaain iniho mocohin Cana Coaunera rai tihane coina nenea nihei. Nitohanelanaalate, le sajeein chabana coaiteen ohenihane coina, raajenihane cana coreniha rai jaberoco telu sohin atinaauruhane coina.

<sup>28</sup> Jana nii Moisesa rai rauhi que coainanohineein nenacaauru saseredotecurute- nechu joareein cachaneein osaaonanein



neurelu. Nete laen, nii Moisesa rai rauhi que cocoainanohichuru baiha, ena nenea saseredote cocoainaane coina, aca Cana Coaunera neein coarajeein icharihanine que aitohalune jaan, rai Calaohineein osaquelanaala- chabana satonoelanaala saseredote neein nihane coina cocoinaelu Cana Coaunera.

## 8

*Ena nenea- cana rai, Cana Coauneraacha teeni terateraneein niha Jesoso ne.*

<sup>1</sup> Nii cana rai saseredote curuaanaacuru Curuaanaa- caa inara rai ereerecaaunne jaante-jataain itolere amurijiriin nelateineein Cana Coaunera rijijieein nihane jaun, Cana Coaunera nelaurihanaja raotono nichajai que nelauriaelu Cana Coaunera rohan.

<sup>2</sup> Acate cana rai esinae rauhijiriin saseredote esine neein Cana Coaunera ichanohineein nenea-*santuario* cuhane neein, Cana Coaunera rene cacha turuaeraneein ne. Coatiha aihuruha leeochoaauru saseredotecurune rijijieein, raajenihane cacha ichanohineein nenea-*santuario* cuhane nihei.

<sup>3</sup> Satiin saseredotecuru Cana Coaunera rai chaaelai teraneein, inihocuru mocohin teranihane coina cocoainanohi nihane jaunte, Jesocurisito netonai nii rijijieein cana osa coreniha raajenihane netelu atinaauruhane coina.

<sup>4</sup> Coatiha caa chauratane caje nenea nihane, saseredote nenea nainerihe. Inae caa chauratane que arajiin neeuruha saseredotecuru, Moisesa rai rauhi cuhane aitohane rijijieein niqui,

Cana Coaunera rai nii Teenforo asaae lenonecuru sohin mocooruhane coina.

<sup>5</sup> Nii saseredotecurute, nechu dedeeu ichacuruhane cojunacaneein nitohanei icharaneein neeurelu. Canate esinae rauhijiriin, nechu dedeeu nenacaauru rijijiei icharaneein ichacuruhane coitucuhacache, *santuario* ichaa Moisesane coina rai: “Aonaaun. Nii ichei ichatane ucuunno coaratihanulune rijijieein ichaaura,” naalu rai Cana Coaunerane caje.

<sup>6</sup> Nete cana rai saseredote laen, jataain nii leeochoauru amurijiriin, jataain cana rai caohacha ichaain, cana rai tihane coina aitohalu Cana Coaunerane rijijieein, Cana Coaunera rene cana turuaeraneein ne.

<sup>7</sup> Bana caohachaaain cachaauru ichao rucuhena nainiha, nii jauriaanejeein nena Cana Coauneraaacha teine, coatiha neriheilu Jesocurisito caa ena niicha tei ichaane coina.

<sup>8</sup> Nete nii jauriaanejeein niicha tei rijijieein neeureniha cachaurune jaun:

“Inae cojoanonaa que turuhane banane,  
 Israeli, Jodaa, naaonjoainuri aina,  
 enachasine canuhacha ichaneni  
 ichareeunnicha.

<sup>9</sup> Nii ena acaauru aina  
 canuhacha ichanenu,  
 coatiha  
 Egipto batane caje  
 acaauru foerateracuru  
 rocohanulune coina,  
 canuhacha ichailu rijiirinaai.  
 Nene,  
 nii acaauru aina  
 canuhacha ichanenu

tonoraelanaala  
ichaaoruhane jaun,  
acaauru que jaolecoonlu.

<sup>10</sup> Nii caa baiha Isaraeli aina  
canuhacha ichanenute,  
acaauru suujua cuhane laenanohineein niha  
Canu rai rauhine,  
suujua caje coauneein  
coitucuuruhane coina  
canuhacha ichanenu ne,  
Canu,  
acaauru Coauneraneein  
nihanune coitucuhin,  
canu cachaneein neeuruhane coina.

<sup>11</sup> Nii bana,  
inae le cachaauru,  
leeochaauru,  
acaauru laurichuru,  
acaauru araaichuru,  
naaonjoainuri,  
inae Canu que  
ita relaauruhane latelanaalate,  
Canu,  
acaauru Coaunera nichaaunne  
coitucuurureein  
satiin ichauhenaauru,  
canaanaihunru,  
naaonjoainuri.

<sup>12</sup> Nii banane  
baaso ichacuruhane que casuujua acateein,  
acaauru osa que canu suujua acatereeeunni,”  
naelu Cana Coaunera.

<sup>13</sup> Nii cana rai nacoauneein enachasine niicha  
ichanenu biha Cana Coauneranete, inae chaque  
nelatelanaala nitaje rai niha nii jaurihaanejeein  
niicha ichanenune coitucueratiha aite.

## 9

*Santuario chauratane que nenaalu aina dedeeu nena santuario.*

<sup>1</sup> Nii jauriaanejeein Cana Coauneraacha teite, caa chauratane que rene nichuuntaauruhane jaanu que *santuario* neein telu Cana Coaunera.

<sup>2</sup> Nitohaneente, nii jauriaanejeein *santuario* neleru asaae jetao nelu leinjiin usi nujua, leinjiin mesa Cana Coaunera que banijiaain nena faan siriin, naaonjoaain.

<sup>3</sup> Jana, que jauriin nena bujua cuhane jetaote, jelai teein Cana Coaunera turunajanein curua-jaelu.

<sup>4</sup> Nii cuhane jetaote, nelu oro caje ichanohineein nena rori, jujui- incienso mocooruhane jaanu que, chaen camela itolereenein oro que carihanojoneein nena. Nii camela cuhane jetaote nelu, oro caje ichanohineein nena- leinjiin baichaje, cuhane manaa neein curuajaain nena quinacai- manaa siriin. Chaen jetao techu, nii camela cuhane nelu Aaroon bastoon omaronalu, Cana Coaunera rai rauhi- ajeri caje nena tabara que teein laenohineein nena, naaonjoainuri.

<sup>5</sup> Nii camela ichoae jetaote nelu- coroatajai cacha rijiinanai itaroojianaain. Acaauru jetaote, ecu niha Cana Coaunerane beraneein jetao, nii nitaro que nii camela fuera asaaraneein ne. Nete ena nelatene jitariin nii coitucuerateein niique irihacane.

<sup>6</sup> Inae nitohaneein satiin ichanohineein nihane jana jetaote, itolere bana nii nunuheneein nena-

Cana Coaunera rene nichuuntaauruna jaaun tuuure saseredotecuru, ecu Cana Coaunera rene nichuuntaain ereereecuruhane coina.

<sup>7</sup> Nejetaote nii que jauriin nena- jelai teein Cana Coaunera turunaja neein nenaau jetao, saseredote curuaanaacuruhacha ecu turue le sajeein le jaanacaauru naineein. Ecu enohane naineein jetaote, lenonecuru coichana amaaure, jauriaanejeein rai nosa coreniha teein, nii baiha coitucuelanaala neosateeuruha cachaaurune coreniha tihane coina.

<sup>8</sup> Niite cana que coitucuerate Cana Coaunera Suujue, nii nunuheneein nena- Cana Coaunera rene nichuuntanaanaja neein nihane jaun, jaiti neniha nii jelai teein Cana Coaunera turunajaaun cana turuaerane jaaun, ecu turunaa naineniha-cachene que.

<sup>9</sup> Satiin niite, nechu cau jaiti ichaohacachene tonohanau cana que coitucuerateranu que nelu. Nii itolere inihocuru mocohin Cana Coaunera belaihuruhane jaan, coatiha nitohanei ichaain coroaeraauru cachaauru suujua couluoona naini-heilu.

<sup>10</sup> Acate raujiaain lenonecuru, conacaihuru, naaonjoainuri couluoraneein, cachaauru netonai chatoanai ichacuruhane, rai jaberoco caje niicha ichai jaaoruhane coarateeuruhane jaanu que nelatelu, cana suujue coriha Cana Coaunera que turuhane reentiaajeein.

<sup>11</sup> Nete laen inae turuhelu Jesocurisito. Acate enene inae cana rai saseredotecuru curuaanaa Curuaanaa esineneein- chabana satonohelanaala nereein. Nii saseredote neein niicha ichai ichaane jaan- *santuariote*, esinae rauhijiriin nesineneein

nena ne. Coatiha raajenihane cacha chanohineein nena nihei, niheichu cau chauratane que nihei.

<sup>12</sup> Nitohaneeinte *santuario* cuhane enohelu Jesocurisito, coatiha aihuruha caa chauratane que nenacaauru saseredotecurune rijijieein, Cana Coaunera rai, cabara curuanaa, toro narejeen, naaonjoainuri coichana tihane coina nihei. Acate raajenihane rai coichana tihane coina, le sajeein enohelu chabana coaitenihane coina. Nitohaneeinte cana rai ichaonaa chabana satonoelanaala nena teraneein nihane jaanu raelu.

<sup>13</sup> Esinaete niqui, nii toro narejeen coichana, cabara curuaanaa coichana, baca narejeen moco bajane, naaonjoaainunri que, chaelai Cana Coaunera que banijiaelanaala nena cabuuruhane couluoorejetelu, Cana Coaunera que banijiaaaineein nihane coina. Nete laen cacha suujue couluoona nainenelu nii ichanacuru.

<sup>14</sup> Nete laen jataain nii amuritoheriin nelateineein ne Jesocurisito coichana, aca Cana Coaunera Suujue, chabana nitajenaacharanejeein nena aina cuaain, raajenihane Cana Coaunera rai cana coreniha ohane coina netihalune jaun. Nitohaneeinte cana suujua letononeein, canaacha ichai coreniha, cana nitaje rai nena caje, cana suujua coreein nelu nii rai coichana- osa colane nena- Cana Coaunera jerei ichaain nihacachene coina.

<sup>15</sup> Nii coinata ohelu Jesocurisito, ena nena Cana Coauneraacha ichaneni aina cuaain, ichoaichaniha neein onacaaurulu, ena neinichaachene, naaonjoainichaachene

Cana Coaunera aina cana tihane, nii inoanlu jauriaanejeein niicha ichai, raujiaain cachaauru osa bujuateraneein nihane caje, acaauru osa que suujua acatena nainiha Cana Coaunerane, satiin niicha ranojineein nenacaauru netonai nii naitoonjoa niicha teeni chabana satonohelanaala nena ichaonaa raeraneein neeuruhane coina.

<sup>16</sup> Oha cachane baiha, rai rucuhele niicha co-coirichai raauruhane coinate, jauriaanejeein oha nii cachane coitucuuruhane rai ne.

<sup>17</sup> Nii jaun, jaiti oheniha nii rucuhele erora cachane, coatiha nii niicha cocoirichai rucuhele ranaa nainihe cache. Inae ohane baihate laen naine nii rucuhele raa nii banihatihane jaan ne.

<sup>18</sup> Nitohanihane jaunte, nii jauriaanejeein nena Cana Coaunera ichai tonoracuruhane coina, carenero sohin rai coichana chororejetucurelu.

<sup>19</sup> Jerichanejeein jetao techu, aina nenacaauru cachaauru rai jetao, nii Cana Coaunera aitoonjoa rauhi bihane baiha jetao, carenero ujui caje, lana caje ichanohi cajione lanajai aina, leinjiin enuha- isopo uune raain jetao, toro narejeencuru, cabara curuaanaa, naaonjoainuri coichana acau que jasiitenohineein nena que setejiaain jetao, Cana Coaunera tenojoi rauhi laenanohineein nena ichoae riajaain cachaauru ichoae netonai ria-jae Moisesa.

<sup>20</sup> Nitohaneein acaauru ichoae riajaain jetaote: “Caate nelaterichaain nii cana rai tonoraacachene coina Cana Coaunera tenojoine coitucuhichene coina, coitucuerateraneein nena Cana Coaunera icharatenohi ichananera,” nae jetao Moisesa.

<sup>21</sup> Chaen jetao techu, loanari *santuario* aina,

nasaae enohane saseredote rai nelatenei coru-  
jueleeuru, naaonjoainuri ichoae riajae Moisesa.

<sup>22</sup> Nitohaneeinte, satiin itolere coichana que ru-  
juaain, jelai teein culuonojoneein nihane coina  
aitelu nii rauhi. Nii jaun, neniha coichana joera  
cana corenihane, nerihei cana osa que suujua  
acatiha Cana Coaunerane jaanu.

<sup>23</sup> Nitohaneeinte carenerocuru sohin rai  
coichana que, nii dedeeu nenacaauru cojunaca  
neein nenea couluocurelu. Nete laen, jataain  
nii amuritoheriin couluoora latelu nii dedeeu  
esineneein nenea.

*Cana osa caje cana rocoeranu quete ohelu Je-  
socurisito.*

<sup>24</sup> Coatiha nii Cana Coaunera nenaja esine co-  
junacatiha cachaauruhacha ichai asaae enohilu  
Jesocurisito. Acate rauhijiriin Cana Coaunera  
nenaja dedeeu cuhin, Cana Coaunera rai, enene  
cana coreniha iriha ne.

<sup>25</sup> Coatiha aihuruha saseredotecuru  
curuaanaacuru, le jaanaca naineein nejelau  
coichana teeuruhane coina araai saain nii  
*santuario* enohine rijijieein, araai saain ohilu  
Jesocurisito.

<sup>26</sup> Nitohanihane chujiangra, necoaanaa cana  
rai chauratanene caje coauneein, ore araai saain  
Jesocurisitona. Nete aca satononiha ecocohin- le  
sajeeincha raajenhane neteein ohelu- chabana  
satoelanaala cana osa caje cana rocoeranu que.

<sup>27</sup> Charijieein teinti le sajeein ooruhane  
caseteco coaracure cachaauru,

<sup>28</sup> nii rijijieeinte le sajeein atinaain, arajii  
cachanichaane, osa aina nenea caje cana  
rocoeranu que tenojoineein nelu Jesocurisito.



Inae nacoauneein tururichaaain niqiu. Nete osaaonacaacuru ichoteratihane coina ainereein, esenetaain acaacha cohajeein nenacaauru ichoteratihane cointate aicheein.

## 10

<sup>1</sup> Nii Moisesa rai rauhi, nechu raujiaain nii turuha uhenenilu rijijieein nihalu nesinenelanaalane jaunte, acaauru osa caje- nii le jaanaca naineein- araai saain jeelai lenonecuru mocohin Cana Coaunera rai teeurera couluoona nainenelu.

<sup>2</sup> Bana nii acaauru osa caje acaauru couluooca nii Moisesa rai rauhine jana nihanete, inae osa caje couluoonohineein neeuruhane coitucuhin, inihocuru mocohin teeuruha Cana Coaunera raine jianecurure.

<sup>3-4</sup> Nete nii toro narejeencuru, cabara curuaanaa, naaonjoainuri coichana, acaauru osa caje, acaauru couluoona nainenihane jaun, osaaonaneein neeuruhane coaauca, nii le jaanacaauru naineein, nii inihocuru mocohi teure Cana Coaunera rai.

<sup>5</sup> Nitohanihane jaunte, inae chauratane que uhane rai:

“Ii rai lenonecuru tein,  
que ii belaihuruhane  
jereneeine jaunte,  
ii rai canu jaberoco tihanune coina  
caletoaacha.

<sup>6</sup> Niheichu  
acaauru osa caje  
couluoonaquine coina,  
ii rai iniho mocohin tein,  
chaaelai que

ii belaihuruhane coina jeriheei.

<sup>7</sup> Aihane jaun, nocoaaun,  
nii Quiricha cuhane  
laenanohineein nihane rijijieein,  
iicha jerei icharaneein  
nihanune coinara  
Cana Coaunera,”  
naelu Jesocurisito Cana Coaunera rai.

<sup>8</sup> Niritiin nii acaauru osa caje couluoonajaane  
coina, rai lenonecuru sohin teein, chaaelai que  
belaihuruhane coina aitiin, rai lenonecuru mo-  
cooruhane coina aitiin, naaonjoaan, rai naitoon-  
joan rauhi rijijieeine saijieein, rautaeniha Cana  
Coaunerane que rai aitohane baihate:

<sup>9</sup> “Nocoa inae cuhanu iicha jerei ichacaaunne  
coina” naain aite Cana Coaunera rai. Nitoha-  
neeinte nii lenonecuruhacha sohin teeuruhane  
coina nena rauhi itajeein, raajenihane rai jabe-  
roco tee, ena nena cana rai Cana Coauneraacha  
teineein nihane coina.

<sup>10</sup> Nitohaneein jeriha Cana Coaunerane rijijieein,  
le sajeein chabana coaitenihane coina, cana  
coreniha ohane coina, raajenihane rai jaberoco  
tihalu Jesocurisitone corenihate, cana osa caje  
cana couluocoelu Cana Coaunera.

<sup>11</sup> Chabana osa caje cacha couluoona naineniha  
lenonecuru sohin teeuruhane saijieeinte, satiin  
saseredote Jorioneein nenacaauru, araai saain  
itolere bana lenonecuru sohin teurelu.

<sup>12</sup> Nete laen Jesocurisito, le sajeein, chabana  
coaiteen ichaenihane coina, osa coreniha rai jabe-  
roco tihane baiha, Cana Coaunera rohan nelauri-  
aelu.

13 Ecute ena neein, que nejeratenacaauru amuritoeratiha Cana Coaunerane cojoae,

14 rai jaberoco teein coreniha Cana Coaunera cachaneein neeuruha cachaurune coina couluoocane jaun.

15-17 Jana Cana Coaunera Suujuete:

“Inae chabananiji

acaauru rai canuhacha ichanenite;

acaauru suujua cuhane laenanohineein niha

Canu rai rauhine,

suujua caje coaunein coitucuuruhane jaan nereein.

Nii jaun inae nenacaeneein

acaauru osa aina baaso ichacuruhane coaaurihaaunni,”

naain aitohalu Cana Coaunerane coitucuerate cana que.

18 Aihane jaun, inae nitohaneein cana osa que suujua acatiha Cana Coaunerane jaun, inae nainihei nenacaen osa coreniha iniho mocohin tenaa nainihei cache.

*Cana Coaunera rohan nichuuntaacachenete ne.*

19 Nitohanihane jaunte rai coichana jaohin ohalu Jesocurisitone coreniha, aina cuaain, inae enene nainichaache, chaque casilanaala tonajelanaala Cana Coaunera nenaja esine *santuario* turuhacachenera canejeraauru.

20 Nitohaneeinte Cana Coaunera rene turunaa nainenihacachene jaan bujuateraneein nenaaitajeein, nii ena nena ichaonaa que turunaa nainichaachene jaanu ajiinchateraneein, rai jaberoco telu Jesocurisito.

<sup>21</sup> Nii jaunte Jesocurisito cana rai saseredote esine neein nihane jaun, aca Cana Coaunera ne-naja acatiha cana turuaeraneein ne.

<sup>22</sup> Aihane jaun cana suujua cuhane asinojoneein cha coacuelanaala, niheichu leecha coacuelanaala, canaacha cohajeeicha que coacuhin, esinae rauhijiriin cana suujua cuhane coitucuhachene saijieein, chachaain nihacachene jianein, Jesocurisito aina cuaain couluonojoneein Cana Coaunera rohan turuhacachenete ne.

<sup>23</sup> Nii jaun coujurihu Jesocurisito esenetaeranein nihacachene jaun, itolere bana esenetaachene rijijieein nihacachenete ne. Inae ecu tihane bana, cana rai niicha teenu naitoonjoalu terichaain Cana Coaunerane jaun.

<sup>24</sup> Nitohanihane jaun ita rijijieein caohachaain neein, itolere bana ita belaaain nihacachene coina, ita coroatajanein nihacachenete caohachae.

<sup>25</sup> Aihane jaun nainihe iahuruha leeochoaaurune rijijieein, ita aina netaojiaain ereerecaachene coiinteein jianena nainihaacache. Coiintelanaalate naine, inae tururichaaain Cana Curuaanaa cojoananaa que turuelalajihane que nainaaain, jiniiquiin itaque corajerateein, ita rai coitucueratihacachene caohachae.

<sup>26</sup> Jana inae raotojoein Jesocurisito coitucuhin nihacachene saijieein, naosatenaa coacuhin nihacachene inae nerinaain nacoauneein cana osa coreniha ohenu.

<sup>27</sup> Nechu usi tabai jana necairichanaa coaraain nitajeeururichaaain Cana Coaunera coitucunaa jerelanaala que nejeratenaa rijijieein

nenacaaurune que banijiaain nenaachate cohajerichaacheein.

<sup>28</sup> Chunocoha, Moisesa rai rauhi tonoraelanaala nihane jana, neeuruha nichatajaain coaraain beeureranete, cairichaojoaain coaraelanaala, sohin jaaorurejetucurelu.

<sup>29</sup> Tana, nii amurijiriin casetecanohiniha cuururichaain, chaque nelatihei rijijieein Cana Coaunera Calaohi teein, cana coreniha ohin rai coichana jaohin naaonjoan, cana belaiha Cana Coaunera Suujuene saijieein, que jaolequiin nenacaaurune coitucuhichene. Nii rai coichana cana coreniha ohin niicha joailute niqui, acaauru rai niicha teeni terichaain Cana Coaunerane coitucuerateein, jelai teein Cana Coaunera cachaneein neeuruhane coina, acaauru couluooraneein nenaane.

<sup>30</sup> Chaen techu: “Canuna cachaauru rai caohacha icharaneein coretereeunni,” naain “Cana Coaunera rai cachaauru rucuhereein,” naelu Cana Curuaanaa.

<sup>31</sup> Nii jaunte, jataain coasihacaine Cana Coaunera nere tonoraain nenihacane.

<sup>32</sup> Nete inara, jauriaanejeein Jesocurisito esenetaaichene nunuheneein, itolere que laraajiin necairichanaa abaantaachelune coaauquichene caohachae.

<sup>33</sup> Inara tabaaurute, satiin notaracaae teein no-coeje chanuhin bisihururejetelu. Nii jana inara tabaaurute, inara aina jiniiquiin necairichaururejetelu inara coinaderaa.

<sup>34</sup> Jerichanejeein techu, cairichaojoaain caresero cuhane nenacaauru coaraain acaauru coinaderarejetocoichelu. Chaen techu inara

rucuhele ruluuruha inara cajene nihanatiin, raotojoein rachoojoein nerejetocoichelu cochunaelanaala. Inae nii amurijiriin chabana nitajenaa nainelanaala dedeeu niha inaraacha raenine coitucuhichene jaun.

<sup>35</sup> Aihane jaun, jiaonriha nitohanein rariquicheeine esenetaain ichaohichene jianiquichene. Acate inara rai jeelai amuritoheriin cainareein.

<sup>36</sup> Nii jaunte, jataain jeelai amuritoheriin necairichanaa abaantaain nena nainequichene jaanu que, itolere que laraajiin neeichene jaanu latequiche. Cana Coaunera jerei ichajeein ichaohichene, tihane coina naitoonjoa raeraneein neeichene coina.

<sup>37</sup> Nitohanihane coinata:  
“Inae ena caeneenejelanaalate turoreein nii turuha uheni.

Coatiha inae carajarihaain.

<sup>38</sup> Canu cachaneein, canuhacha esenetaain ichaonacaurute, chabana nitajeeurenereein. Nena laen canu cachaneein nihane jianein, jauriaa ichaohalune rijijieein ichoai que nejeratereeeunni,”

naalu Cana Coaunerane, ne laenanohineein rai Quiricha inoaensi cuhane.

<sup>39</sup> Jana cana, coatiha nii rai cachaneein neeuruhane jianein, jauriaa ichaoruhane rijijieein ichaonacauru caseteco coaracuruhane rai nenacauru nihaacache. Canate esenetaain ichaoruhane jaun, ichoteratenojoneein

neeururichaaine rai nenacaauru rijijineein nihacache.

## 11

### *Cana Coaunera esenetaain niha cachane*

<sup>1</sup> Esinae rauhijiriin Cana Coaunera esenetaacanete, chabana canaacha coaraai terichaain cana raine cohajeein ichaohaca.

<sup>2</sup> Cana foerateracurute raujiaain esenetaauruhane jaun, cache caohacha rijijieein acaauru coarae Cana Coaunera.

<sup>3</sup> Cana Coaunera esenetaacachene jaunte, nereecha que chauratane coaunalune coitucuhacache. Nii jaunte, chabana cacheacha coaraai caje coaunanojineein nene, caa enene canaacha coarai.

<sup>4</sup> Cana Coaunera esenetaane jaun techu, nii rai nihana Caain amurijiriin, jataain caohacha nejesina mocohin que Cana Coaunera belaiha Abeline jaun, caohacha icharaneein raain nii rai niicha tei raelu Cana Coaunera. Nii jaunte, inae ohalune saijieein enanetojoein Abeli coaaucaache, Cana Coaunera esenetaeraneein nihane coitucueratiha cana quene jaun.

<sup>5</sup> Cana Coaunera esenetaane jaun techu, nabana ohane coataa jaberoco neein Enoco raa Cana Coaunerane jaun, inae nii baiha coarihurenelu. Cana Coaunera Quiricha inoensi cuhanete, jaiti raeniha Cana Coaunerane ajiniha, jeriha Cana Coaunerane rijijieein ichaohalu Enocone que aite.

<sup>6</sup> Nete esenetaenihane Cana Coauneraacha jerei ichajeein ichaonaa nainene chuni cache. Cana Coaunera aina nena jerichaanete, niha Cana

Coaunerane esenetaain, aina nenea jerenacaauun, niicha jerei ichajeein ichaonacaauru cainaera-neein niha Cana Coaunerane esenetae esenetaera.

<sup>7</sup> Cana Coaunera esenetaane jaun techu, inae chabana acaauruhacha coaraai icharichaaaine beein suujuatiha Cana Coaunerane tonoraain, leinjiin bote tabai jaelu Nohe, cuhane rai comasai aina saain rai bereecuru aina nichotihane coina. Nitohaneein esenetaane jaun techu, nii esenetaelanaala chauratane que satiin nenacaauru cachaauru caseteco coaracuruhane jana, esenetaain nenacaauru ichoteratenojineein neeruhane rijijieein ichoteratenojineein nelu Nohe.

<sup>8</sup> Nii rijijieein techu, Abaraaun netonai Cana Coaunera esenetaane jaun, cotihacane tonoraain rai natane ratiriin, nii cunaja jelai coitucuelanaala cuhin, esenetaeraneein nihane cainaera-neein, rai Cana Coaunera teenu atane que ichaoha cuelu.

<sup>9</sup> Nitohaneein Cana Coaunera esenetaane jaunte, nii rai Cana Coaunera teenu atane que leecha atane caje unaaneein ichoaelu Abaraaun. Ecu jetaote, neloheritelanaala raujiaain loanariicha asaae ichoaelu, aihuruhalu nii rai, Cana Coauneraacha tei raeraneein neeninunru Isaca, Jacobo, naaonjoainurine rijijieein.

<sup>10</sup> Cana Coauneracha ichai- chabana nitajenaachara nese que ichaonaa jerihane jaunte, leecha neseu cuhin ichoaelanaala loanariicha asaae ichoaelu Abaraaun.

<sup>11</sup> Cana Coaunera esenetaane jaun techu, inae



camotojoe nihane jaun canaanai sirina naineniha Sarane jana, inae Abaraaun netonai biinaa nihane saijieein, rai naitoonjoan icharihani nohanelanaalane esenetaane jaun, lararajiaa Cana Coaunerane aina nelararajiaain canaanai sirilu Abaraaun.

<sup>12</sup> Nitohaneeinte, inae jataain biinaa nihane saijieein, janiinacajelanaala cucuana cuhane nenea carene catu aina arasijie jeeoneein, cachaauru foerateraneein nelu Abaraaun.

<sup>13</sup> Satiin nii cachaaurute ohelu, jaiti nii acaauru rai tihane coina Cana Coaunera aitoonjoa jitaain raelanaala. Nete jataain Cana Coaunera esenetaauruhane jaun, nota que coara rijijieein coitucuuruhane jaun, nechu leeocho atane caje unaa-neein, caa cana rai chauratane que ichaaoruhane coitucuurelu.

<sup>14</sup> Nitohaneein ichaaoruhane coitucuhacachene cajete, jaiti caa chauratane que, nii acaauru rai Cana Coauneraacha teenu chabana satonolanaala acaauru ichaonajaanu atane raurenihalane coitucuhacache.

<sup>15</sup> Bana nii jeelai nataneecha que coaacuuruhane jana nihanete, jelaiha caaururelu.

<sup>16</sup> Nete nii acaauru rai Cana Coaunera teenu atane raauruhane coina, jelaiha caunaa nainecurenelu. Nii atane acaauruhacha raenute dedeeu nenaane. Nii jaunte, nitohaneein acaauru que leinjiin nese banihateein rucuhacane jaun, acaauru Coauneraneein nihane coejene Cana Coaunera.

<sup>17</sup> Nitohaneein Cana Coaunera esenetaane jaun techu, esenetaane cojuha rai calaohi Isaca sohin mocohane coina, rai aitoha Cana Coaunerane

jana, Isaca sohin mocoha nejerelu Abaraaun.

<sup>18</sup> Nitohaneeinte: “Ii calaohi Isaca cajete nefoerateeurureein iicha foerateeuricha” naa rai Cana Coaunera natiin, acaihaniji rai calaohiniha Isaca ne saijieein rai sohin mocoha Abaraaun ne jere Cana Coaunera.

<sup>19</sup> Ohane caje, cacha ichatena nainiha Cana Coaunerane esenetaane jaunte, nii rai calaohi atinaain tihane jere Abaraaun. Nii jaunte, Cana Coaunera rai tihane baiha, nacoauneein nii rai calaohi raelu. Nitohaneeinte jataain chaque nelateineein nelu nii Abaraaun.

<sup>20</sup> Cana Coaunera esenetaane jaun techu, rai calaohichuru- Jacobo, Esao, naaonjoainuri coroatajanerichaaain Cana Coaunerane coitucuhin cojiotaelu Isaca.

<sup>21</sup> Cana Coaunera esenetaane jaun techu, inae ohane rai netiin, rai calaohi Jose calaohichurule cachaauru cojiotaain coroatajanerichaaain Cana Coaunerane que aitiin, rai nunera que netemeriaain, Cana Coaunera corojelu Jacobo.

<sup>22</sup> Cana Coaunera esenetaane jaun techu, inae ohane rai netiin, Egipto caje mituururichaaain rai naraaichuru Isaraelitacurune que aitiin, rai jaberoco amauruha acaauru jiniichaaine caina aitelu Jose.

<sup>23</sup> Cana Coaunera esenetaauruhane jaun techu, canaanaihuru soaajeratiha Egipto curuaanaa *reyne* jana, nejanoaa Moisesane jana casilanaala, nichata ateein asinojoineein aina sirichurelu, jataain caohachajei canaanai nihane jaun, rai fojiaraauru.

24-25 Cana Coaunera esenetaane jaun techu, *Rey* Faraaon cacunu, calaohi rijijieein nena jerenihane jaun, inae ichauchenaneein rai naraaichuru-Cana Coaunera cache neein nenacaauru aina jini-inquiin cairichanojoneein nelu Moisesa. Jaiti caa chauratane que osaonacaauru aina ichaohane bana.

26 Nitohaneeinte, jataain Cana Coaunera esenetaane jaun, rai cainarichaaain Cana Coaunerane coitucuha nota que coara rijijieeine jaun, Egiptoo raotojoei ichaonaa que ichaonaa nainihalune que jaolequiin, jataain nii amuritoheriin nelateineein cache ichoteratera- Mesihasi rijijieein cocoinanohineein necairichanaa jerihane jaun, naraaichuru rene cuelu Moisesa.

27 Cana Coaunera esenetaane jaun techu, sohin jaohane coina arichatiha curuaanaa *reyne* jana, casilanaala Egipto batane caje amuhin, ecu aina neein coarajiha Cana Coaunerane jana ainaan rijijieein, Aca jerihane rijijieein nelu Moisesa.

28 Nitohaneein esenetaane jaun techu, besetaneein neeni- Fasocoa janonaa nunuhe bitoaain, satiin Isaraelitacuru nenaja bacuujuuauru rujuerate ichana que Moisesa. Nabana Isaraelitaneeuruhane calaohichuru ajichacuru atinaa Cana Coaunera letono anjerane coataa.

29 Cana Coaunera esenetaauruhane jaun techu, atane jacoro que ainaa rijijieein, cucuana jera jaaorelu Isaraelitacuru. Jana Egipto cocoaichacuru acaauru caaijie cuhalaaain satiin naluhin oorelu.

30 Cana Coaunera esenetaauruha Isaraelitacurune jaun techu, caainsi janoneein

cojoanoonetojoein cuhin, caainsi saneein Jericoo nese tinonocuruhane jana, neranuha tinonoritiin nenea nii ajeri caje ichanohineein nenea nii nese tinoritiin ucuuneti rijiane jana, satiin cocoaichacuru sohin jaaorelu.

<sup>31</sup> Cana Coaunera esenetaane jaun techu, nii Jericoo nenacaauru cachaaauru sohin jaaoruhane ucuatoha, nii ecu nenea ene cojoaelorohe sohin jaaorenelu. Nitohaneein esenetaane jaun, acaauru letonocuru coroatajai cunacaauru raa raotojoein rai loreri asaaene jaun.

<sup>32</sup> Jaitite lanacure Gedeeon, Baraca, Saansoon, Jefete, Rabiri, Samoeri, chaen *profetacuru*, naaonjoainunri que inara rai irihanune, nena inae jianeun.

<sup>33</sup> Satiin niichuru jetaote, Cana Coaunera esenetaauruhane jaun, lauri lauri nenacaauru atanecuru ruluhin jetao, jeriha Cana Coaunerane rijijieein ichaain jetao, acaauru rai niicha teeni Cana Coaunera aitoonjoan atane raauorelu. Tabaauru leon ucuha cuhane jaonojoinecuruhane nihanatiin quinaa nainenelu leon, leoncuru ujuae fuhane coina, rai anjera letoaa Cana Coaunerane jaun.

<sup>34</sup> Jana tabaauru jetaote, Cana Coaunera esenetaauruhane jaun, usi tabai jana jaonojoinecuruhane nihanatiin, tonajelanaala usi caje nichoteeurelu. Chaen tabaauru jetaote, sabere caje nichoteein sonaana que casihuruhane saijieein, nii baiha nelararajiaain sonaana que acaauru que nejeratenacaauru amuritoorelu.

<sup>35</sup> Tabaauru enecuru rai jetao techu, acaauru araaichuru onacaauru ichatecurelu.

Jana tabaaaurute cairichanojoneein neeuruhane caje nichotena coacuelanaala oorelu, ooruhane nihanatiin Cana Coaunera aina raotojoei ichaonaa que ichaaorurichaaine esenetaauruhane jaun.

<sup>36</sup> Jana tabaaaurute acaauru nocoeje chanuhin bisinojoneein, *cadena* que ichoanojoneein caresero cuhane tenojoneein, naaonjoaurelu.

<sup>37</sup> Jana tabaaaurute, ajeri que bodoosiin, sera que cataaun terunojoneein, sabere que sonojoneein, naaonjoain oorelu. Chaen techu, cajihanein amuhemujueein cairicheinejeein, carenero, cabra, naaonjoainuri ujui que cajonecoojoein, cairichanojoneein nererojoeicaeriin, naaonjoain neeurelu.

<sup>38</sup> Nii cachaaurute chauratane que, nelatihei rijijeein, cunaja coitucuelanaala cajihanein, cacha areroo cuhin, ichatane ucuunno cuhin, ajeri jioararo jachu cuhane neein, atane jachu ucuacaain nena cuhaneuru cuhin amuhemujueein nerejetocurelu.

<sup>39</sup> Nete nitohanein esenetaain neeuruhane coreniha cacha caohacha rijijeein coaranaaca Cana Coaunera natiin, chuni rai naitoonjoan nicha teeni tenelu,

<sup>40</sup> cana coacuhin cana rai jataain caohachanein niicha tei esenetaeranein neinichaachene aina cuaain, acaauru netonai cana aina jiniiquiin esinae rauhijiriin caohacha icharanein ranojoneein neeuruhane coina.

## 12

*Jesoso coarajein nena rijijeein, itolere bana*

*queecha coaaucuche.*

<sup>1</sup> Nitohaneein inae cana que Cana Coaunera esenetaauruhane coarateein coitucuherateeuruhalu nii cachaaurune jaun, jeriha Cana Coaunerane rijijieein ichaonaa jerichaachene nihanatiin itolere bana osaacha ichana coacuhin nihacachene coina cana acateraneein nenea jianeein, canaacha esenetai jerenohi ichajeein laraajiin ichaohacachenete caohachae.

<sup>2</sup> Aihane jaun, nii esenetaacachene jaan tera neein aca cana suujua rucuherraneein niha Jesusone jaun, queecha coaaucaachenete ne. Inae nii baiha raotojoein rachoojoein Cana Coaunera rori- *trono* raotono nichajai que nelauriaain nerichainne coitucuhane jaunte, rai nocoeje chanuhin coroso que teein atinaauruhane jana, coejenelu.

<sup>3</sup> Nitohanihane jaun, itolere bana Jesoso cairichaaeriin neeuruhalu osaaonacaauru cachaaurune que, inara suujua cuhane coaaucuche. Aihane jaun, chatohanei coaraain neeichene nihanatiin, jiaonriha coiinteein esenetaaichene jianequichene.

<sup>4</sup> Niheichu nii osa que nesarucuhichene coataa necairichanaa coraquichene jaun coreniha ori-heeicheein.

<sup>5</sup> Nete inae inara, rai calaohi suujuatiha casete- caane rijijieein, inara suujuatiha inara casetecaa Cana Coaunerane jaan baitequiche. Rai Quiricha cuhanete:

“Jiaonriha

ii suujuatiha, ii casetecaa

Cana Curuaanaa que jaolecoinera cacalabi.

Niheichu  
 baaso ichaaine coreniha  
 ii casetecaane,  
 nainiheei  
 esenetaaine jianeeine.

<sup>6</sup> Niicha belaaite suujuate  
 Cana Curuaanaa.  
 Jerichanejeein techu,  
 rai calaohi rijijieein  
 niicha rai casetecaain ne,”  
 naain ne Cana Coaunera Quiricha cuhane.

<sup>7</sup> Nitohanihane jaun, inara casetecaane abaantaain neeichenete, rai calaohi belaihane rijijieein inara belaicheein Cana Coaunera. Nihei chuni canaanai- inacaacha suujuateinelanaala nei.

<sup>8</sup> Jana rai calaohi rijijieein nenacaauru casetecaa suujuatihane rijijieein inara suujuatiha, inara casetecaeniha Cana Coauneranete, rai calaohi esinenelanaala, rai nere tonorae neeichene jaun aicheein.

<sup>9</sup> Chaen techu, caa chauratane que nenacaauru- cana fojiaraauru- cana casetecaain cana suujuateeuruhane, tonoraain nerejetocoaachelu, tonaain erenaa coacuelanaala. Nitohanihane jaun, cha caaunna nii amuritoheriin dedeeu nenea Cana Inaca Cana Coaunera cana suujuatiha, cana casetecaane abaantaain nenerihacache, chabana satonohelanaala nenea ichaonaa raacachene coina.

<sup>10</sup> Cana fojiaraaurute, jaiti caa chauratane que ichaohacachene jana, nechu raujiaain acaauru jerecuruhane rijijieein nihacachene coina, cana suujuateeurelu. Nete Cana Coaunera laen, Nesineneein caohacha icharaneein nihane jaun

cana rai caohacha ichaa cana suujuatiha cana casetecae.

<sup>11</sup> Coatiha niqúi raotohi caseteco coaracaane, rijieeoritiin cunaain tacaane jaun. Nete nitohaneen cana teen cana relaera tonoraain ichao-hacane, rauhijiriin raotojoei ichaonaa que ichao-haca.

*Jataainte elunae cana rai Cana Coauneraacha beratei que jaolecohacane*

<sup>12-13</sup> Aihane jaun, nacoauneein nelararajiaain caohachaaain ichaaoche. Nacoauneein caohachaaain rauhijiriin inara suujua coaraain ichaohin, jerichanejeein nacanacaaena coacuelanaala neeichene coina.

<sup>14</sup> Satiin cachaauru aina raotojoeen ichaaoche, cojoerihu jeriha Cana Coaunerane rijijieein ichao-hichene coina. Jeriha Cana Coaunerane rijijieein ichoameniha cachane, nihei chuni Cana Curuaanaa coarana nainerinaain.

<sup>15</sup> Atiin jiniinquiin, jeriha Cana Coaunerane rijijieein, ita coroatajaneen neeuche. Nabana chuni nitohaneen nihane jianihane, cacha atinaa ajaena corainei rijijieein leeochoauru ichao aasaecane coataa.

<sup>16</sup> Jiaonrihachu chunocoha inara caje, nejelau ene aina ichaohane. Niheichu rai Cana Coauneraacha tei que jaoleconaa nainihe. Nitohaneen ichaane jaunte, nechu lenoneecha coreniha, aca nihana saijieein, raineen nenea telu rai nocoala rai Esao.

<sup>17</sup> Nii jaunte, nii coitucuhichene rijijieein, rai caohachanu tiha rai inacane coina bajaane saijieein tenelu rai inaca. Mainajeein chanaain bajaane saijieeinte, tenelu inae nitohanihane jaun.



<sup>18</sup> Nete laen inara, aihuruhalu Isaraelitacurune rijijieein, chatohanai dadaain coanacai, usineein iihanei, nocohena tabai, cujuana tabai aina nocohena, naaonjoain nenea rohan nii nichuuntaeneeiche.

<sup>19</sup> Niheichu toniha jaihane aonaheeiche. Niheichu toniha Cana Coaunerane aonaheeiche.

<sup>20</sup> Nii aohanraauru jetaote laen, nii naitoonjoan tonorana nainesihurenihane jaun, abaan-tasilanaala acaauru rai iriha Cana Coaunerane jianeratecurelu. “Chunocoha, caa nihanune jaan-ichatane ucuunno rohan nichuuntaain, ecu turuhin, jelai shaquiin, naaonjoainte ajeri jaberoco, rejoon, naaonjoain que sohin jaonjoinereein, lenone neein aihane nihanatiin” naain iriha Cana Coaunerane jaun.

<sup>21</sup> Nitohaneein jataain coasinacaa, nii acaauruhacha coaraine jaun jetaote: “Jataaine rijijijianeun canu nesoone caaunra” nae jetao Moisesa.

<sup>22</sup> Nete laen inara nii amuritoheriin, Cana Coaunera nenaja esine Sioon bichatane ucuunno, dedeeu nenea Jerosaleeun nichuuntaaiche. Chaen techu oaraanca neein netaojiaain Cana Coaunera coroaecuruha coina, netaojiaain neeruha anjeraaurune jana coaraqiche.

<sup>23</sup> Chaen techu, ichoaichaniha Cana Coaunera calaohi neein dedeeu cocoirichanojineein nenacaauru rohan turuhin coaraqiche. Nitohaneinte satiin caohachaaain ichaonacaauru cachaauru, aca jerihane rijijieein teein niicha ranojoihunru rai Joesionein nenea- Cana Coaunera rene turuhiche.

<sup>24</sup> Chaen techu nii ena nenea Cana Coauneraacha teratei teraneein nenea

Jesocurisito- rai coichana que cana couluoorane maajein coaraquiche. Nii rai coichanate jauriaanejeein cana cairichaeranu que nihalu Abeli coichana jana, jataain nii amuritoeriin cana rai nelateineein ne.

<sup>25</sup> Nitohanihane jaun, cana rai ereein niha Cana Coaunerane que jaolecohin, batiin neeichene que necohalajiin neeuche. Coaracuche nachuhinti nii jaiti cau chauratane que ne bana, suujuate-najaane coina Cana Coauneraacha cotihacurilu, caje nichotena nainecururiha. Aihane jaun, nii amuritoheriin nichotena nainerihacacheein dedeeu netiin cana suujuatihane que jaolequiin nihacachene.

<sup>26</sup> Nii iriha Cana Coaunerane bana jetaote, nii rai nereecha caun nerurujuaelu canarai chauratane. Nete ena laen: “Nacouneeina chauratane rurujuareeunni le sajeein. Coatiha Chaurataneecha nerurujuarinaain, cana rai dede netonaite nerurujuareein,” nae Cana Coaunera.

<sup>27</sup> Niritiin: “Nacoauneein le sajeein” naain aito-hanete, satiin niicha coaunanojoneein nerurujuanaa naineein nenacaauru itajihane jana, nerurujuanaa nainelanaala nenaacha nedaane coina aitoa Cana Coaunerane coitucuerate cana que.

<sup>28</sup> Nii cana rai Cana Coauneraacha tei- rai Cojoanonaate chabana nitajenaa nainene. Nii coreniha “Narihara Cana Coaunera,” naain jini-iquiin rai cachaneein neuruhane coarateein aca jerihane rijijieein coroaeraauru aina coaroaecaachenete ne,

<sup>29</sup> itolere baaso itajera- usi rijijieein niha Cana Coaunerane jaun.

# 13

*Naaonjoaain, rai suujua rijijieein nihacach-enete jere Cana Coaunera.*

<sup>1</sup> Jiaonriha ita nejeraneein nenea rijijieein, jini-iquiin ita belaaïn neeichene jianein neeichene.

<sup>2</sup> Niheichu inara rene turunacaauru belaaïn raachene jianein nenea nainiheechene. Nitohaneein nenacaaurute, acanihane coitucuelanaala Cana Coaunera letonocuru anjeraaurune maa-jeein raarelu rai loreri asaae.

<sup>3</sup> Aitiin caresero cuhane nenacaauru netonai coaucuche, acauru aina jiniiquiin caresero cuhane nenea rijijieein. Chaenchu cairichaaerinojonein nenacaauru netonai coaucuche, inara netonai acauru rijijieein cairichanojonein nenea nainequichene jaun.

<sup>4</sup> Nitohanihane jaun, inara quichaauru, enecuru, naaonjoaineeichene nisirihateein neeichene, itaque inara suujua acatein, leecha inara sinijerane lanaala nenea coacuelanaala, inara sinijera ainaacha ichaaoche; satiin baaso ichaain rai sinijerane lanaala nenea aina ichoai casetecarichaaïn Cana Coaunerane jaun.

<sup>5</sup> Jiaonrihachu coriquiicha que coacuhin neeichene. Inara rucuhele inaraacha sirii ainaacha raotojoein ichaaoche: “Chabana nihei inara jianein inara que jaolecohanune” naalu Cana Coaunerane jaun.

<sup>6</sup> Niritohalu cana rai Cana Coaunerane jaun chaque tonajelanaala nainichaache:

“Cana Coaunerate canu coroatajaneranein ne. Nii jaun chaque casinaaun.

Chatonai ichana nainiheí canu que camute cacha,” naain erenaa nainichaache.

<sup>7</sup> Inara suujuateein Cana Coaunera ere que inara relaaureralu coacuhin, acaauru ichao que coacuhin, esenetaain ichaaoruhalune rijijieein ichaaоче.

<sup>8</sup> Jesocurisitote jeelaineein nereein, chabana satonoelanaala.

<sup>9</sup> Aihane jaun jiaonriha nejelau cuaain inara relanaajerera nihane, rijitoejeein esenetaain nee-ichene. Nii amuritoeriinte jataain nelate, jeriha Cana Coaunerane rijijieein cana suujua ilaain ichaohacachene. Coatiha chaque nelatihei, nii ni-icha quiinelanaala nenea iniho quiniha cachane nihanatiin. Coatiha chabana cana rai chaque nelatejeehai nii.

<sup>10</sup> Canate coroso que ohalu Cana Coaunera Calaohi Curisitone coreniha jianacoon osa caje nihacache. Nii *santuario* tein saseredotecuru ichanaa coatiha inae chaque nelateein nedaai.

<sup>11</sup> Jana jauriaanejeein nenaalute, saseredotecuru curuanaacha lenonecuru sohin, *santuario* cuhane rai coichana terejetelu osa anihoaeraanu que. Nete laen, nii lenone jaberocooru, acaauru loanari caje naain amaain jelai tein mocorejeto-curelu.

<sup>12</sup> Nii rijijieein techu Jesoso netonai, naain nese caje amaain jelai tein atinanohinelu; rai coichana que satiin rai cachaneein neinichaachene culuocane coina.

<sup>13</sup> Aihane jaun, aina jiniiquiin nese caje amano-joinnein cana netonai necarichanaa abaantacachene ne, aihalune rijijieein.

14 Coatiha caa chauratane que nihei cana rai leeinjiin nese chabana nitajenaacharanejeein nei. Nii jaun, chabana nitajenaacharanejeein nena ariirijiacachenete ne.

15 Aihane jaun, itolere bana Cana Coaunera coroaecaachenete ne, rai Calaohi Jesocurisito aina cuaain. Nii Cana Coaunera coroaecaachenete belaiha rai canaacha teenineein nereein. Aihana jaun cana ujuaae caje coroaecaachenete ne.

16 Jiaonriha caohacha ichana baiteein, leeochoaauru rai inaraacha sirii teein naaonjoaain neeichene jianequichene. Nitohaneein ichoaiterautaaain coarae Cana Coaunera.

17 Inara relaaunera ere tonoraain jerecuruhane rijijieein neeuche. Acaaurute nebetacaelanaala inara beraaihure, Cana Coaunera rai jitaain inara aina nichanaa beeuruhane rai neeuruhane jaun. Aihane jaun, acaauru jerecuruhane rijijieein, inaraacha ichai ichaain neeuche; acaauruhacha rautaaai ichaelanaala. Jana aineeichene, coatiha inara rai chaque nelateriaain inaraacha ichai.

18 Atiin canacaanu coreniha Cana Coaunera bajaauche. Jataain raotojoiha canacaanu suujua-nena jerichaanu; itolere que caohachaain ichana jerichaanune jaun.

19 Jataain inara aina nacoauneein nena jerichaaunne jaunna, inara aina nihanune coina Cana Coaunera bajaachene coina, inararai aitoon.

*Raotojoein jiniiquin neeuche.*

<sup>20</sup> Rai coichana aina cuaain chabana satonoe-lanaala nenea ichaonaa tera- rai cachaneein ni-hacachene beraichaneein nenea- nii o caje Jesoso ichatera Cana Coaunera,

<sup>21</sup> inara ichao rucuerateeine Jesocurisito que, aca jerihane rijijieein cha chaain neeichene coina. Chaen Jesocurisito aina cuaain canacaanu que niicha jerei ichamiin. Itolere bana satonoe-lanaala, Curisitoneein niha Curisitone coitucuumiin satiin cachaauru. Bajiaanachuhinti aihurene.

<sup>22</sup> Atiin raotojoein caa inara suujua nunaeraanu que inara rai canuhacha laenai raauchera canejeraauru.

<sup>23</sup> Cana nejera Timoteeote, inae caresero caje mitue. Enanocoojoa turuhanena, inae inara coaraa uhanune, canu jiniichaain uhareeunni.

<sup>24</sup> Satiin inara bichauhenaauru aina, satiin Cana Coaunera cachaneein nenacaauru rai, acaauru coaaucaanne beeuche. Italiau nenacaauru netonoaite inara coaacure.

<sup>25</sup> Jataain jeelai amuritoeriin inara coroatajane-miin Cana Coaunerate, satiin raotojoein neeiche.

## **Cana Coaunera Ere** **New Testament in Urarina (PE:ura:Urarina)**

copyright © 2008 Wycliffe Bible Translators, Inc.

Language: Urarina

Translation by: Wycliffe Bible Translators, Inc.

Urarina [ura], Peru

### **Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Urarina

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

b7ea44d4-3dbd-507b-9a19-256b56fe9b07